

Xlimactiy Xcarta San Pablo Huantu Catzóknih Corintios

Amäkolh huantí aya xtalipahuán Cristo nac xacächiquín Corinto nilay xcálimaxtucán o para nahuancán nacalihuilcán cumu la liucxilhtiyán lata akstítum talipahuán Cristo, porque hasta huatunín ni xlakalhiniy huantú akstítum tapaxquit. Lhuhua huantí ni xtaucxilhputún San Pablo, porque ni xtamatlantiy nacamapeksiy cumu la xapuxcu, y ni xtacanajlay para xlícaná huá xapóstol Jesucristo.

Cumu xlá xcatziy lácu xtalitaaklhuhuimánalh huá xpamacata San Pablo lacpúhua pi xafuerza nacatzokniparay mactum carta, pero nac umá carta xlícaná pi luu tlhueke lata caxakatlilacama. Masqui xlícaná pi nac umá xtatzokni mákat tuncán takaxmata pi caquihníma, pero xlá camacatziníma amäkolh xtacanajlanín xalac Corinto pi xlícaná capaxquiy y stalanca camacatziníy pi xlá ya tapaxuhuán lacasquín camaatzankénaniy.

Nac xliakasputni umá libro calacahuaniy xlihuák amäkolh aksaninanín lacchixcuuhuín huantí talitaxtuy cumu la lacuán xapóstoles Cristo y xlá xlíhuák xlitlhueke tamaktayay cumu la xaxlicaná xapóstol Cristo, lichuhuínán lácu Cristo man tasiyúnih y lilacsacnít laqui xapóstol nalimáxtuy.

¹ Aquit Pablo huantí Dios quilacsacnít laqui naclitaxtuy xapóstol Jesucristo, aquit chu Timoteo

ccatzoknimán eé carta xlíhuák huixinín huánti lipáhuanátit Jesús y huilátit nac xacächiquín Corinto y nachuná xlíhuák natalanín huánti tahuilánalh xlicalanca nac xapulatamán Acaya. ² Clacasquín pi Quintlāticán Dios xahua Quimpuchinacán Jesucristo cacamaxquín tlán latámat y cacalakalhamán.

Lhuhua huántu nitlán xtlahuanicán Pablo nac Asia

³ Canecxnicahuá calakachixcuahuíhu Dios xtlat Quimpuchinacán Jesucristo porque huá Quintlāticán huánti snun quincalakalhamanán y ná ankalhiná quincamaxquimán licamama.

⁴ Dios quincamaxquiyán licamama acxni lipuhuamánáhu laqui nachuná nacamaxquiyáhu licamama xamakapitzín cristianos huánti talipuhuamánalh, y ná nacalakalhamanáhu chuná cumu la xlá quincalakalhamanjítán.

⁵ Lhuhua huántu aquinín lipatimanáhu caj xpápacata Cristo, pero ná caj xpápacata Cristo Dios quincamaxquiyán tapaxuhuán y licamama.

⁶ Xlicana lhuhua huántu aquinín clipatimanáhu caj xlacata huixinín nakalhiyátit tapaxuhuán nac milatamatcán, y tlán namalaktaxtiyátit milistacnicán; cumu para Dios quincamaxquiyán licamama laqui nackalhiyáhu litlihueke, pus nachuná chú aquinín tlán ccamaxquiyán litlihueke chu licamama chu tapaxuhuán laqui nitu naliakatiyunátit y natayaniyátit acxni para túcu kalhiyátit nahuán mintalipuhuancán.

⁷ Aquinín luu clipaxuhuayáhu lata huixinín akstítum huilinitátit mintacanajlatcán, y masqui ccatziyáhu pi lhuhua huántu napatiyátit nachuná

cumu la aquinín cpatinitáhu, ná tancs ccatziyáhu pi Dios amán camaxquiyán tapaxuhuán y taakstítumílit.

⁸ Natalán, aquit clacasquín xlacata pi huixinín xcatzítit lata lácu aquinín cpatináhu nac xapulatamán Asia. Xlicana pi lhuhua huantú quincalimapatiñicán hasta niaj lay xacpatiyáhu, xahuachí akatuyumá xaccatzinitáhu pi máx niaj xastacná cactitaxtúhu antá. ⁹ Aquinín xaclacpuhuanáhu pi máx antiyá xquincalakchanán nacniyáhu, pero xlihuak huantú antá quincaakspulán tancs clistactayáhu pi nilay túcu ctlahuayáhu quecstucán, sinoque huá Dios naclipahuanáhu huanti hasta tlán camalacastacuaniy nín nac calinín para chuná lacasquín. ¹⁰ Y xlicana huá quincamaktayán acxni lhuhua huanti xquincamaknijputunán, y clipahuanáhu pi canecxnicahuá quincalakmáxtumán nahuán masqui tícu xquincamaknijputunán. ¹¹ Pero ankalhiná cakalhtahuakanítit Dios caj quimpalacatacacán; y para lhuhua cristianos huanti takalhtahuakaniy Dios xlacata naquincamaktayayán mas atzinú lhuhua huanti natapaxcatcatziniy acxni xlihuak natacatziy pi xlicana huá quincamaktayanítán nahuán.

Huantu xpälacata Pablo nilay líalh nac Corinto

¹² Aquinín ckalhiyáhu tapaxuhuán porque ccatziyáhu pi akstítum clatamanitáhu uú nac caquiltamacú y neçxni tì ccakskahuinitáhu, náchuná acxni xaclamánuáhu nac milakstipancán cumu la

huixinín catziyátit. Pero m̄asqui luu tancs chú clamanáhu, ni caj quecstucán quintalacapastacnicán clicatzinítahu pi chuná naclatamayáhu, sinoque huá Dios quincamácatzinín y quincalakalhamán laqui chuná tancs y akstítum naclipahuanáhu. ¹³ Y nāchuná nac quincarta, n̄ecxni tu ccamatzekeñiyán quintalacapastacni laqui chuná tlān naccaliaksihuimiyán, pero laṭa tu likalhtahuakayátit quintachuhuín luu chuná clacasquín naakataksátit pi huá luu quintalacapastacni, y ckalhkahliy pi ankaliñá chuná naakataksátit quintachuhuín. ¹⁴ Pero m̄asqui acatunu ni huāk akataksátit quintalacapastacni clacpuhuán pi quilalipahuanáhu y huāk c̄anajlayátit huāntu ccalimakalhchuhiñiyán, y huá clipaxuhuay porque chuná huijnuhán huāntu lacxtum nalipaxcatcatziníyáhu Quimpuchinacán Jesús acxní namín xlimaktiy, caj xp̄alacata tu tlahuanīt quilacata x̄hua milacacán.

¹⁵ Y cumu xaccatziy pi nacanajlayátit huāntu naccalimakalhchuhuhiñiyán, amá quilhtamacú acxní cqiláhu nac Macedonia luu xaclarlhcānit pi maktiy naccatilakapaxialhnán. ¹⁶ Aquit xaclarpuhuanit pi pulh huixinín naccatilakapaxialhnán acxní nacán nac Macedonia y acxní nacquitaspita naccatilaktaxtuparayán xlimaktiy laqui chuná huixinín tlān naquilamaktayayáhu y naquilamaxquiyáhu huāntu nacmaclacasquín nac tiji acxní chū nacán nac Judea. ¹⁷ Pero cumu ni ccalakanchán xamaktum para nalacpuhuanátit pi aquit ni cmakantaxtiy huāntu clitayay, o para clikalhtinán y acalistán ni ctlahuaputún, max nalacpuhuanátit pi

caj luu chuná ccatziy ccalíkalhkamanán.

¹⁸ Stalanca catziy Dios pi aquinín nichuná ckalhchuhuinanáhu para nacuanáhu “tlan” y acalistán chú niaj cmakantaxtiyáhu huantü clitayayáhu. ¹⁹ Porque aquinín cmacastalayáhu amá Jesucristo huantí Silvano, Timoteo y aquit cliakchuhuinanáhu, xlicana pi huá Xkahuasa Dios y xlá niitu mālacnuy huantü ni catimakantáxtih. Jesucristo huá xtalulóktat Dios, ²⁰ porque xlá makantáxtih xlíhuak huantü Dios xquincamalacnúninitán. Huá xpalacata lihuanáhu “Amén” o “Chuná calallh” acxni lakachixcuuhuiyáhu Dios, porque catziyáhu pi namakantaxtiy. ²¹ Pus huatiyá chú umá Dios huantí aquinín chu huixinín quincalacsacnítán laqui nalipahuanáhu y nalacscujniyáhu y huantí tlan naquincamakstítumiliniyán quilatamatcán.

²² Dios quincalisellartlahuanítán xEspíritu Santo laqui huak nacatzicán pi huá tapeksiniyáhu y xlá lama nac quinacujcán laqui namaklhcatziyáhu tzinú amá lanca tapaxuhuán huantü xacchán naquincamaxquiyachán acalistán.

²³ Pero aquit xtacuhuiní Dios cliquilhán xlacata naquilacanajlaniyáhu huantü xpalacata ni niaj ccalilakanchán nac Corinto laqui ni caj naccamakalipuhuanán. ²⁴ Pero ni tipuhuanátit para acxni naccalakanachán caj luu xafuerza nacchuanilemputunán laña lácu luu nalipahuanátit Dios, porque ccatziy pi huixinín aya tlhueklh hui-linitátit mintacanajlatcán, huata aquinín caj ccamaktayaputunán nac mintacanajlatcán laqui ak-stítum nalatapayátit y nakalhiyátit tapaxuhuán.

2

¹ Huá xpamacata aquit chuná aktum ctlicátzilh pi niaj naccalakanachán para caj naccalacaquihniyán o naccaleniyán talipuhuanán. ² Porque para aquit caj naccamakalipuhuanán, ¿tícu cahuá naquimakapaxuhuay acalistán nac milakstipancán? ¿Apoco lipaxúhu naquilatalitziyanáhu cumu mismo aquit ccāmakalipuhuanítán nahuán? ³ Aquit cticatzoknín amá mactumlitum carta laqui antá naccalihuaniyán huantú niatlán xtlahuayátit y nacaxlayátit xlacata pi acxni naccalakanachán niaj xlacasquinca nahuán pi naquilmakalipuhuanáhu huata clacasquín caj naquilmakapaxuhuayáhu; y aquit stalanca ccatziy pi xlihuak huantu naquimakapaxuhuay ná nacamakapaxuhuayán. ⁴ Pero acxni ccätzoknín amá carta huantú cticāmacanichán luu lipecua xaclipuhuama akatiyuj xaclama caj xpamacata huantú xaccáhuanimán y hasta xactasama. Pero ni tipuhuanátit pi ni ccalakalhamanán huá ccaliquilhnín, huata aquit chuná cticatzoknín laqui nacatziyátit pi xlicana ccalakalhamanán y clacasquín nacaxlayátit.

Pablo lacasquín catamatzankenanolhá amá chixcú huanti xtlahuaniit talakalhín

⁵ Tamá chixcú huanti tláhualh lixcájnit talakalhín y xquincamakalipuhuanítán, masqui xlicana luu xquimakalipuhuanít pero ccatziy pi átzinú huixinín xcāmakalipuhuanít porque huixinín lacxtum xtalapátit, masqui ni luu xlipacs huixinín laqui luu xlicana tu nacuán. ⁶ Masqui xlicana pi aquit ccahuanín lácu natlakaxtuyátit

huánti ni akstítum xlama pus aya tlān lāta xmapatínipátit. ⁷ Huata chū camatzankenanítit y camaktayátit, xahuachí capaxquiparátit cumu lāxapulh, porque para nichuná natlahuayátit tamá cristiano caj lāta xtalipuhuán nalaktzankatayay. ⁸ Huá ccalisquiniyán litlán, mejor tancs camasiyunítit miliputumcán pi xlicana lakalhamanátit laqui niaj nalipuhuán. ⁹ Xlicana pi amá xapulh quincarta huantú cticatzoknín antá lacatancs ccahuánin pi namapatiniyátit tamá para nā huá chuná cltláhualh porque xaccaliucxilhputunán para xlicana natlahuayátit huantú aquit ccalimapeksiyán. ¹⁰ Y chū cumu mapatinítit y listactayanít camatzankenanítit, y cacatzítit pi xlihuak huánti huixinín namatzankenaniyátit para túcu ntílán xtlahuanít, pus nachuná aquit cmatzankenaniy, y cuan cmatzankenaniy porque nachuná aquit ccalakalhamán, y stalanca catziy Cristo pi huantú ccahuanimán xlicana. ¹¹ Y laqui chuná natlahuayáhu, nilay caquinticamakatlaján xtala-capastacni akskahuiní, porque xlá ankalhiná lacputzama lácu tlān naquincamakatlajayán pero aquinín huakatá lakapasáhu xtáyat.

Pablo lipuhuán acxní chālh nac Troas porque ni manóklhulh Tito

¹² Aquit cchālh nac Troas laqui nacliakchu-huinán xtachuhuín Quimpuchinacán Jesús y Dios quimaktáyalh laqui nataakataksa huánti antá xalanín. ¹³ Pero masqui chuná aquit chunatiyá akatiyuj xaclama y ní tancs xuí quintalacapastacni porque ní cmañóklhulh antá quintalacán Tito huánti xacmälakachanít nac milakstipancán.

Huá xpälacata nimakás quilhtamacú tuncán ctacaxpá y calh putzay nac Macedonia aver para naclakapaxtoktayay nac tiji.

Huánti lipahuanáhu Jesú斯 litaxtuyáhu cumu la ciensus huántu tlān mucsún

14 Pero chú cāna cpaxcatcatziniy Dios pi juerza tayania xtachuhuín Cristo laqui xlihuák cristianos nataucxilha pi chu xmanhuá mapeksinama nac quilatamatcán. Pus Cristo quincalakalhamanitán y lakpalinít quilatamatcán laqui naliakchuhuinanáhu xtachuhuín y lacaxtum namálapuntumiyáhu latachá nícu aquinín quichanáhu xtachuná cumu la perfume huántu luu tlān mucsún. **15** Porque aquinín huánti lipahuanáhu Cristo litaxtuyáhu cumu la ciensus huántu luu tlān mucsún y huántu Cristo lilakachixcuhiy Quintlaticán Dios, y umá ciensus lacaxtum chan xlimucsún chuná nac xlakstipancán huánti talakmaxtumánalh xlistacnicán chu huánti tamalaktzankemánalh. **16** Xlihuak huánti taamánalh talaktzankay, umá tachuhuín huántu aquinín clíakchuhuinanáhu ni talakatiy y lámpara lixcájnit quincalimacanán, pero xlihuák huánti taamánalh talaktaxtuy luu talakatiy huántu cuanáhu y tacanajlay. Pero chú calacpuhuántit, ¿tícu cahuá tlān sacstu namakantaxtiy eé lanca tascújut huántu Dios quincamáxquinitán? **17** Aquinín nitu caj cltlajamánáhu tumín xtachuhuín Dios cumu la tatlahuay makapitzín, huata cumu man Dios quincamálacscujumán y quincaucxilhmán,

chuná tancs cmäkantaxt^{iyáhu} quintascujutcán cumu la xlá lakatij.

3

Xasasti quilatamatcán cumu la mactum carta huantú tzokma Cristo

¹ Acxni chiné cchuhuinán max lacpuhuanátit pi caj quecstu clitalanquima xlihuak quintascújut huantú ctlahuama laquí chuná tlán naquilalipahuanáhu. Osuchí max lacpuhuanátit pi xlacasquinca nacputzay tícu naquintlahuaniy mactum carta antanícu nahuán pi tlán huantú cliscujmañáhu cumu la tatlahuay makapitzín osu lacpuhuanátit pi ccasquinimán tlán naquilatlahuaniyáhu tamá carta. ² Tancs ccahuaniyán pi aquinín ni cmaclacasquináhu tícu naquin-camakchuhuinán xlacata tlán naquincalipa-huancanán, porque mañ huixinín huantí lakpalinitátit milatamatcán litaxtuyátit cumu la quincartajcán huantú tlán maluloka pi cscujnítáhu, pero eé carta ni caj nac cápsnat tzokuilicanit huata nac minacujcán, y catihuá huak likalh-tahuakay porque caucxilhcanátit lácu akstítum lapátit. ³ Xlicana stalanca tasiyuy pi huixinín amá carta huantú tzoknít Cristo, y quincamaxquicanitán aquinín laquí nacmásiyuyáhu, pero ni huá litzokcanit tinta sinoque huá litzokcanit xEspíritu Dios xastacná, xahuachí xaletra umá carta ni antá lhpitcanit nac xlacán pektum chíhuix cumu la tzokuilíca tamá xamakán kampacáhu xlimapeksín Dios, sinoque nac xnacujcán cristianos.

4 Y huá chuná clihuanáhu porque clipahuanáhu Dios y ccatziyáhu pi xlá tlán maluloka pi xlicána quintalakalhincán chu huántu tlahuaniit Cristo nac quilatamátcán. **5** Pus necxni calacpuhuántit para aquinín quilacán eé liskalala huántu clichuhuinanáhu, huata xlihuák huántu aquinín ctlahuayáhu chu huántu clichuhuinanáhu huak huá Dios quincamaxquiyán. **6** Porque xmanhuá Dios huanti tlán naquincamaxquiyán liskalala laqui nacliakchuhuinanáhu xasasti xtalacaxlán laṭa lácu nacalakmaxtuy cristianos. Umá xasasti talacaxlán ni xtachuná cumu la aktum caj xatazzokni limapeksín huántu ni kalhiy litlihueke namaktayay huanti makantaxtiputún, huata huá kalhiy lanca litlihueke laṭa lácu Espíritu Santo lakpalij xlatámat huanti nalipahuán Jesús. Amá xatazzokni xlimapeksín Moisés caj tlán macatzinij huanti ni tancs makantaxtima pi napatiñán, pero xEspíritu Dios maxquij sāsti latámat huanti lipahuán Jesús.

7 Acxní Dios máxquilh amá kampacáhu xlimapeksín y xlá cálpitli xaletra nac pektum chíhuix, xlicána pi luu licácnit lácu Dios masíyulh xlitlihueke y xtaxkáket huántu kalhiy, porque acalistán hasta cristianos nílay xtaucxilhniy xlacán Moisés laṭa lipecua xmájakachixinán masqui nimakas quilhtamacú laclaninikolh laṭa xlislipua. Pero calacpuhuántit, para amá limapeksín huántu xcáhuaniy cristianos lácu xlipatinatcán para ni natamakantaxtiy luu licácnit lácu masíyulh xlitlihueke Dios acxní camáxquilh, **8** ¿pi lihuaca chú ni licácnit lanchú

quilhtamacú lácu Espíritu Santo camaxquima
sasti latámat xlihuák huánti lipahuán Jesúš?

⁹ Umá quitaxtuy para lanca licácnit quilhtamacú
acxní Dios mástalh amá lipécuánit xlimapeksín
porque xquincamácatziniyán pi juerzaj
napatinanáhu xpápacata quintalakalhín, pus
mas lanca licácnit quilhtamacú chú pi tlán
lipaxúhu liakchuhuinanáhu lata lácu Dios
quincalacxacaniyán xlihuak quintalakalhincán
laqui niaj napatinanáhu. ¹⁰ Porque masqui
xlicana pi luu lanca cácnit xkalhiy amá
xakampacáhu xlimapeksín Dios huantu timástalh
xamakán quilhtamacú, xlicana pi lanchú niaj tu
luu limacuán para caj huá tamálacastucáhu amá
lanca laktáxtut huantu lanchú quincamaxquiyán.
¹¹ Y cumu Dios limasíyulh lanca xlicácnit caj
xpápacata huantu nimakas quilhtamacú niaj tu
limácuaj, pus chú atzinú tlak ámaj limasiyyu
xlicácnit amá laktáxtut huantu lanchú kalhiyáhu
cumu neçxnicú catiláksputli canecxnicahuá
quilhtamacú.

¹² Cumu aquinín stalanca ccatziyáhu pi
naquincamaxquicanán huantu quincamálacnu-
nicanitán, huá xpápacata ni cquilhpuhuanáhu
cliakchuhuinanáhu. ¹³ Aquinín niitu
cmatzekmánaáhu cumu la tláhuah Moisés acxní
xlakatlapacán laqui ni natalacaucxilha amakolh
judíos y ni natacatziy pi aya xlaksputnit lata
xmájakachixinán xlacán. ¹⁴ Xlicana pi ni caj
xmána xlakastapucán judíos nilay talilacahuánan,
huata nachuná xtalacapastacnicán, porque
hasta la cälacchú lhuhua judíos huánti

talikalhtahuakay amá xlimapeksín Moisés chunacú lámpara túcu calacahuaca y nilay lihuana taakataksa túcu luu huaniputún; pus niá lihuana cámálacahuanicán xáhuachí tamá huántu ni lihuana malacahuáninán caj xmanhuá Cristo tlán lactlahuay. ¹⁵ Hasta la calacchú quilhtamacú acxní judíos talikalhtahuakay amákolh libro chu límapeksín huántu cätzoknít Moisés nilay taakataksa túcu huaniputún. ¹⁶ Pero acxní chatum cristiano lipáhuán Quimpuchinacán xlícana pi nítu lakatokha y tlán lihuana lacahuánán, tlán chú lihuana akataksa huántu xapulh ni xakataksa xtachuhuín Dios. ¹⁷ Porque antanícu puxcún Quimpuchinacán Jesús nac xlatámat chatum cristiano na antá puxcún xEspíritu Dios, y antanícu puxcún xEspíritu niaj lay tanuyachá talakalhín osu para túcu nítlán laqui xtachín nalimáxtuy cristiano. ¹⁸ Y xlíhuák aquinín huánti aya lipáhuanáhu Quimpuchinacán y niaj tu xatalakatlapán lamáñáhu, litaxtuyáhu cumu la aktum espejo antanícu stalanca tasiyuma pi Dios kalhiy lanca xlítlihueke, xáhuachí aquinín ankalhiná lihuaca xtachuná cumu la xlá tilatámalh, huá chuná lilacapastacáhu y kalhiyáhu xtalacapastacni, porque nac quilatamátcán lama xEspíritu huánti quincámacaktayalemán.

4

¹ Huá xpálaceata ni clítaxlajuaniyáhu mäsqui túcu quincalakchinán huántu nítlán, porque stalanca ccatziyáhu pi huá Dios quincámacacamáxquinitán eé tascújut. ² Aquinín nítu ctlahuama-

náhu huántu lixcájnit y límaxaná; nití tu cliakska-huimanáhu huántu nichuná quincalimapeksiyán Dios, huata huántu akstítum clichuhuinanáhu y cmalulokáhu xtachuhuín. Y Dios clímacanáhu pi stalanca catziy huántu ccáhuanimán laqui hui-xinín tlán naquilacanajlaniyáhu. ³ Y para huá umá tachuhuín huantú aquinín cliakchuhuinanáhu makapitzín talacpuhuán pi nítu límacuán, xlicana pi caj xman huatunín nilay taakataksa huánti taamánalh talaktzankatayay. ⁴ Porque huá amá akskahuiní huánti mapeksinán nac umá caquiltamacú camalakaxokenit xtapuhuancán laqui ni nataakataksa amá lipaxúhu xtamacatzinín Cristo huántu mastay laktáxtut. Porque xtachuná cumu la lanca taxkáket quincalima-lacahuanimán lácu kalhiy lanca xlicácnit Dios. ⁵ Huá xpalacata acxní aquinín cakchuhuinanáhu ni cuanáhu para aquinín caquila lipahuanáhu, huata ccálimakalhchuhuiniyáhu cristianos pi huá catalipáhualh Jesucristo porque huá Quimpuchinacán; porque aquinín caj xtasacuán Jesús y cumu clipahuanáhu huá lipaxúhu ccájiscuján laqui hui-xinín ná nalipahuanátit. ⁶ Porque huá amá Dios huánti maktum quilhtamacú chiné huá: “¡Caánalh taxkáket antanícu huak capucsua!”, pi huatiyá chú umá Dios huánti quincamaxquiyán taxkáket nac quinacujcán laqui nalakapasáhu lanca xlicácnit Dios huántu masiyuma nac xlatámat Jesucristo.

Dios maakpuhuantiyaniy huanti patinán caj xpalacata

⁷ Xlicana pi lanca xtopalh amá taxkáket huántu Cristo quincamaxquinitán, y aquinín antá

mäquinitáhu nac quimacnicán huántu litaxtuy cumu la patum tlamanclh nimá litlahuanit lilhtámat, pero nipara makas quilhtamacú natapaklha. Huá chuná litlahuama laqui Dios stalanca namasiyuy pi huá quincamaxquimán litlihueke lata xlíhuak huántu aquinín ctluhamanáhu nilay túcu aquinín ctluhayaáhu quecstucán. ⁸ Por eso masqui lhuhua ckalhiyáhu taaklhúhuit, aquinín ni clacpuhuamanáhu para nilay cactitaxtuníhu; masqui lhuhua huántu clitaaklhuhuiyáhu pero ni clitaxlajuaniyáhu. ⁹ Masqui ankalhiná quincaputzastalamacán, pero Dios ni quincaakxtekmakanítán; masqui lakachunín quincamacucticanán, pero ni maktum quincamaknicanán. ¹⁰ Latachá nícu aquinín canáhu liakchuhuinanáhu xtachuhuín Jesús, ankalhiná quincakalhkalhimán huanti naquincamakniyán xtachuná cumu la makníca Jesús, pero cumu ni quincamakninitán hasta chú, antá stalanca tasiyuy pi Jesús lama xastacná porque huá quincamaktakalhmán. ¹¹ Pus lihuán clamánáhu y clichuhuinanáhu xtachuhuín Jesús ankalhiná huij nahuán huanti naquincamakniputunán caj xpälacata; pero luu tlán la quitaxtuma porque chuná masiyuyáhu nac umá quimacnicán huántu nanij y ni kalhiy litlihueke xlacata pi ankalhiná lama xastacná Quimpuchinacán Jesús nac quilatamatcán. ¹² Xliankalhiná ni tzankay ti quincamaklhtiputunán quilatamatcán caj xpälacata cumu clichuhuinanáhu xtachuhuín Jesús, pero huixinín caj xpälacata cumu

lipahuanátit kalhiyátit latámat chú laktáxtut.

13 Nac likalhtahuaka chiné huan chatum nac Salmos: “Aquit ccenájlalh huántu huan Dios huá xpälacata clíchuhuínalh.” Pus náchuná chú aquinín cumu lipahuanáhu y canajlayáhu pus na lichuhuinanáhu xtachuhuín. **14** Porque stalanca catziyáhu pi amá Dios huánti mala-castacuánih Jesús nac calinín náchuná naquin-camála-castacuaniyán acxní naniyáhu laqui lac-tum la huixinín cumu la aquinín huánti lipahua-náhu Jesús xastacná naquincalenán nac xlacatín Dios. **15** Xlihuák huántu aquinín quincakspu-lamán huixinín amán calimacuaniyán, porque laṭa ątzinú lhuhua cristianos nac milakstipancán caj xpälacata quintachuhuincán nataakataksa pi Dios capaxqui, náchuná ątzinú lhuhua cristianos natapaxcatcatziniy xpälacata xtalakalhamanín y natacacninaní Dios.

16 Huá xpälacata aquinín ni clítaxlajuaniyáhu mäsqui túcu quincaakspulayán, porque mäsqui koluma quimacnicán, huá quili-stacnicán xcha-liyán skatama y tiyama litlihueke. **17** Umá huántu patimánáhu uú nac cäquiltamacú nimakas nat-i-taxtukoy; xahuachí nitucu xkásat para huá nata-mala-castucáhu amá lanca lipaxúhu latámat tu ni laksputa huántu acalístán naquincamaxqui-canán. **18** Porque aquinín ni caj xmanhuá lak-puhualacanáhu huantu tasiyuy uú nac cäquiltamacú, huata huá ucxilhlacachamánáhu huantu ni tasiyuy; porque xlihuák huantu uú tasiyuy nac cäquiltamacú laksputa, pero huantu xalac akapún ni tasiyuy canecxnicahuá makapalay.

5

¹ Umá quimacnicán huántu lilamáñáhu nac caquilhtamacú litaxtuy cumu la quinchiccán antanícu huilanáhu, y acxní nalaclay y naniyáhu caj namacnucán, pero stalanca catziyáhu pi masqui eé quimacnicán nalaksputa Dios quincalíkalhimán tunu xasasti quimacnicán xalac akapún huántu necxni catiláclalh.

² Huá xpälacata lipecua tlakaj layáhu lihuán kalhiyáhu umá quimacnicán lakpuhualacanáhu amá quimacnicán xalac akapún y huatiyá xlilatamacháhu. ³ Porque nalitaxtuy cumu la quihakatcán huántu naquincalimalhakecanán laqui ni xaluntu nalatamayáhu. ⁴ Pero xlícaná tlakaj layáhu y lipuhuanáhu lihuán lilamáñáhu eé quimacnicán porque ni lakatiyáhu pi acxní naniyáhu y caj nalacmastamay nac tíyat niaj tu nakalhiyáhu quimacnicán tu nalilatamayáhu, huata lacasquináhu pi tuncán caquincamaxquicanchán amá túnuj xasasti quimacnicán huántu nakalhiyáhu.

⁵ Cäna cpaxcatcatziníy Dios porque huá quincamaxquinitán umá tlán xtalacapastacni, xlacata tancs nacatziyáhu pi huántu quincamaxquinitán huák namakantaxtiy chü xlá quincamaxquín xEspíritu Santo, laqui aya natzucuyáhu catziyáhu huántu acalistán naquincamaxquicanán nac akapún.

⁶ Huá xpälacata ankalhíná akpuhuantiyayáhu porque canajlayáhu xlihuák huántu mälacluy Dios, masqui catziyáhu pi lihuán uú lamáñáhu nac caquilhtamacú y kalhiyáhu eé quimacnicán, quitaxtuy pi mákat lamáñáhu pero xamaktum

nalakchánáhu Quimpuchinacán. ⁷ M̄asqui xlícaná pi lanchú nilay ucxilháhu cumu lá xlá tasiyuy, sinoque caj xm̄an lipahuanáhu y akstítum lamáñáhu cumu kalhiniyáhu tacanájlat. ⁸ Cumu xlícaná lipahuanáhu huántu quincamálaçnuninitán, aquinín tlakaj layáhu y acatunu lacasquináhu pi aya xmakxtekui eé quimacnicán y maktumá aya xlakcháhu Quimpuchinacán. ⁹ Huá xp̄alacata aquinín ankálhiná makapaxuhuamáñáhu Quimpuchinacán Jesús, chuná para acxní naniyáhu y namakxtekáhu eé quimacnicán o para acxní nalilatamayahucú. ¹⁰ Porque xlíhuák aquinín naquincalichancanán nac xlacatín xpumapeksín Cristo laqui namaklhtinanáhu quintaskahucán huántu chatunu quincalakchánán, para akstítum o lixcájnit xlítlahuamáñáhu quimacnicán lihuán xlamáñáhu nac caquiltamacú.

Umá xtachuhuín Jesús quincamaxquiyán tlan latámat

¹¹ Cumu aquinín stalanca ccatziyáhu lácu Dios ámaj c̄amapaq̄inij cristianos caj xp̄alacata xtalakalhincán, huá juerza ccalimq̄akatzankeyáhu cristianos pi catalipáhualh. Cumu Dios stalanca quincalakapasán y catziy pi ni caj cakskahui-nama acxní clichuhuinanáhu, clacpuhuanáhu pi nachuná huixinín quilalakapasáhu. ¹² Ni nalac-puhuanátit para caj clilacataquínamáñáhu umá quintascujutcán huántu ctlahuamáñáhu, huata ccamáxquimán quilhtamacú xlacata nakalhiyátit tapaxuhuán caj quimpalacatacán y laqui tlan

nacákalhtipaxtokátit huánti nítlán quincalichu-huinanán acxní talilacataquínán huántu taliscujmánalh, tahuán pi xtachuhuín Dios taliscujmánalh mäsqui ni talakpalimánalh xalixcájnit xtalacapastacnicán. ¹³ Para tícu lacpuhuán pi aquinín caj clakahuitimanáhu acxní chuná clichu-huinanáhu quintascujutcán xmán Dios catziy, pero para lacpuhuanátit pi chí lacatancs huántu clichuhuinanáhu cakaxpáttit huántu naccahua-niyán porque amán cámaktayayán nac milata-matcán. ¹⁴ Catziyáhu pi Cristo snún quincala-kálhamanán y huá limakxtekáhu pi camapek-sínalh nac quilatamatcán. Cumu catziyáhu pi huá tínlh caj xpälacatacán xlíhuák cristianos, ná quilicatzitcán pi xlíhuák huanti lanchú talipahuán quitaxtuy pi ná aya tataninít. ¹⁵ Cristo nilh caj xpälacata naquinçalakmaxtuyán y laqui aquinín huánti lipahuanáhu líhuán lamánáhu uú nac caquilhtamacú niaj nalatamayáhu caj huántu quecstucán sinoque huá natapeksiniyáhu porque huá nilh y lacastacuánalh caj quimpalacatacán. ¹⁶ Xlíhuák aquinín nilay nalimaxtuyáhu para lixcájnit xtapuhuán chatum chixcú caj xpälacata cumu chuná talipulhcay xamakapitzín cristianos, mäsqui xlícaná pi xapulh makapitzín aquinín xlí-pulhcayáhu Jesús cumu la catihuá chixcú porque chuná xtalipulhcay xamakapitzín, pero lanchú niaj chuná límacañáhu porque aya catziyáhu tícu tamá Jesús. ¹⁷ Porque xlíhuak huanti tatapeksiniy Cristo quitaxtuy pi xasasti cristiano, niaj talaca-pastaca cumu la xapulh porque xlíhuák huántu xamakán aya titaxtukolh, huanchú tu kalhiy xta-

lacapastacni lanchú huak xasasti.

18 Xlihuak umá huantu quitaxtuma huá Dios chuná tlahuama, xlá matlántilh pi Cristo naxokonuniy quimpalacatacán laqui aquinín huantí xmakalipuhuanítáhu Dios caj xpalacata quintalakalhincán chú tlán naquincamá lacatzuhui parayán nac xlacatín; xáhuachí quincamaxqui yán tascújut xlacata cacamaxatziníhu xlihuak cristianos pi niaj ti capecuanilh Dios caj xpalacata cumu limakasitzinit xtalakalhín porque chú tlán tapatiniy. **19** Acxni xlá macámilh Cristo tancs xmasiyuma pi xlacasquín niaj catapecuánilh catamá lacatzúhuilh xlihuak cristianos xala caquilhtamacú, y niaj cuentaj xcatlahuanima xtalakalhincán huantu xlacán xtatilahuaniy; y aquinín quincalacsacni laqui nacliakchuhuinánáhu eé xtamacatzinín. **20** Aquinín luu xpalacachuhuinání Cristo quincalimáxtucanitán, y lámpara Dios man camáakpuhuantiyanimán nac quintachuhuincán xlacata pi calipahuántit. Huá xpalacata nac xtacuhuiní Cristo ccalimáqakatzankemán pi calaktalacatzuhuití Dios porque camatzankenaniputunán laqui akatziyanca natalatapayátit. **21** Cristo ni tláhuall talakalhín, pero caj quimpalacatacán Dios limáxtulh cumu lámpara xtlahuanit talakalhín laqui chuná tlán naquincapalakaxokonunán y nac xlacatín Dios nalitaxtuyáhu cumu lámpara nítu xtitlahuanítáhu talakalhín.

6

Lanchú lakchanit quilhtamacú lata naquincalakmaxtuyán Jesús

¹ Pus cumu Dios quincamaxquinitán uumá tascújut lata nacpalacachuhuinanáhu, nac xtacuhuiní ccalimqakatzankeýán xlacata pi ni páxcat catlahuít amá xtalakalhamanín Dios huantü xlá camaxquimán. ² Porque caj calacapastáctit xtalchuhuín huantü xlá huan lacatum nac likalhahuaka:

Acxní luu lákcháll quilhtamacú ckáxmatli huantü xquisquinípat pi naclakalhamanán;

y cmaktayán acxní aya xpímpat laktzankaya.

Xlicana pi lanchú xquilhtatá lata nalipahuanáhu y naquincalakalhamanán. ¡Lanchú aya lakchanit quilhtamacú lata naquincalakmaxtuyán!

³ Aquinín claktzaksayáhu nipara maktum xaclimalacahuañináhu huantü nitlán tascújut laqui ni nalilaclatayay huantü lanchú cliscujmáñáhu. ⁴ Huata luu ankalhiná cmäsiyumanáhu pi xlicana huá clacscujnimáñáhu Dios, porque cpaxcatlenáhu mäsqui nitu tu cmacclasquimanáhu, mäsqui quincalakchinán taaklhúhuit, y hasta mäsqui lhuhua huantü quincalimapatinicanán. ⁵ Quincalacputzanicanán lata naquincasitzinicanán, quincatamacnucanán nac pulachin y lipecua quincakesnokcanán, chuná para huá quintascujutcán, quintatzincsnicán, xahua quintalakachihualhtatacán. ⁶ Nächuná stalanca cläsiyumanáhu quilatamatcán pi huá clacscujnimáñáhu Dios porque chunatiyá lata akstítum clamáñáhu, tlán quintapuhuancán,

catuhuá huántu cpaxcatlenáhu, clakapasáhu huántu xtalulóktat Dios, y tasiuyu pi Espíritu Santo lama nac quilatamatcán porque ankalhiná ccapaxquiyáhu laatachá tícuya cristiano.

⁷ Nächuná cumu clakapasáhu xtalacapastaci Dios y tancs cliakchuhuinanimanáhu xtachuhuín mákat tasiuyu pi ckalhiyáhu xlitlihueke Dios. Ankalhiná huá clilamanáhu huántu akstítum tascújut, chuná acxni quincasakalicánan o acxni clacatahuacayáhu huántu nitlán.

⁸ Acatunu lactalipahua quincalimáxtucanán y lakachunín quincalikalhkamanancanán, lakachunín tlán quincalichuhuinancanán y acatunu caj quincasitzinicanán, acatunu huancán pi caj cliakskahuinamanáhu huántu cuanáhu masqui luu tancs y akstítum clichuhuinananáhu xtachuhuín Dios. ⁹ Masqui xlicana pi makásá uú clamánáhu y lhuhuatá huanti quincalakapasán, acatunu quincalimáxtucanán cumu lámpara nití quincalakapasán. Masqui xlicana pi ankalhiná quincamaknippetuncanán, pero chunatiyá clamánáhu xastacná; ankalhiná quincamapatinicanán pero ni quincamaknicánan.

¹⁰ Masqui ankalhiná quincakspulayán huántu tlán naclilipuhuanáhu pero ankalhiná ckalhiyáhu tapaxuhuán; aquinín lacpobre pero lhuhuatá huanti ccalimaktayanitáhu y lacrriko ccalimaxtunitahu quintachuhuincán; y masqui nitú ckalhiyáhu huántu xtapalh tumín pero nitucu quincatzankaniyán huántu cmaclacasquináhu nac quilatamatcán.

¹¹ Natálán xalac Corinto, aquit nitú ccqakska-huimán huata tancs ccamákalhchuhuinimán

porque ccapaxquiyán xlihuak xlitlihueke quinacuj. ¹² Aquinín nipara pulactum ckalhiyáhu quintalacapastacnicán huantú caj xaccamaaktzékuilinín o ni xaccáhuanikón, huata huixinín chuná licatziyátit ni huák quilamácatziniyáhu huantú caakspulayán o huantú maklhcatziyátit. ¹³ Huá xpalacata ccálimaqatzankeyán cumu la chatum chixcú huanti catachuhuinán xlakahuasán, xlacata pi para túcu quilahuaniputunáhu huák caquilahuaníhu y caquilamácatziníhu chuná cumu la aquinín ccamácatziniyán quintalacapastacnicán y ccákalhamanán.

Dios quincalimáxtuyán cumu la xpusiculan xastacná antanícu xlá lama

¹⁴ Para tícu ni talipáhuán Dios huixinín ni lacxtum catatlahuátit mintalacapastacnicán, porque caj líhuana calacapastátit: ¿pi tlán tatalacastuca huantú nítlán tascújut amá huantú akstítum tascújut? ¿Pi tlán lacxtum tlay cacuhuiní xahua catzisní? ¹⁵ Chuná cumu la Cristo nilay tatalakxtumiy akskahuiní, na nipara huanti lipáhuán Cristo chu huanti ni lipáhuán. ¹⁶ Xlihuak aquinín huanti lipáhuanáhu Dios ni quincaminiyán natatalakxtumiyáhu huanti talakachixcuhuiy tzincun. Porque Dios quincalimáxtuyán cumu la xpusiculan xastacná antanícu xlá lama, chuná cumu la maktum quilhtamacú chiné huá: Aquit ankalhíná clámaj nahuán nac xlatamatcán latachá nincocxni, porque aquit Xpuchinacán y xlacán quinca manán.

17 Huá xpalacata chiné huamparay Dios:
 Catapanútít nac xlakstípāncán y ní lakxtum caca-
 talátít;
 nítu caxamátit huántu nitlán,
 laquí aquit tlán naccatalatamayán,
18 y aquit Mintlaticán nacuán y huixinín quilaka-
 huasán y quilactzumaján nahuanátít.
 Chuná huan Quimpuchinacán Dios huánti lanca
 xlacatzúcut.

7

1 Natalán, xlihuak umá huántu Dios tihuanchá
 xamakán quilhtamacú aquinín quincamálacnú-
 nicanitán. Huá xpalacata ccalihuaniyán pi chun-
 natiyá akstítum calatamáhu y nítu tilimaxcajuali-
 yáhu quimacnicán xahua quilistacnicán, huata
 caj xmánuá akatiuj caliláhu lata lácu tlán nali-
 makapaxhuayáhu Dios y lácu tlán namapek-
 sinán nac quilatamatcán.

Pablo luu calipaxuhuay cristianos xalac Corinto

2 ¡Xtlahuátit litlán cañacaj tzinú xquilálakalha-
 máhu! Porque nípara chatum cristiano ctlahua-
 niyáhu huántu nitlán, nítí ctaratlahuamánuáhu y
 nítí caksahuimanáhu. **3** Ní huá xpalacata chuná
 ccáhuaniyán para caj naccalilacataquiyán o nac-
 calilacahuaniyán para nitlán mintapuhuancán,
 sinoque cumu la ccáhuán xapulh pi huixinín
 ankalhiná ccapaxquiyán xlihuak quinacú laqui
 nacatziyátit pi acxtum lipaxúhu nalatamayáhu
 y ná lacxtum lipaxúhu naniyáhu. **4** Aquit cca-
 paxquiyán huá xpalacata lacatancs ccalixakat-
 liyán y nítu ccamaaktzékuiliniyán, xahuachí luu
 ccalipaxuhuayán lácu quilakalhakaxmatáhu, y

masqui lhuhua huantu quincalimapatinicanán huixinín quilamaqpuhuantiyaniyáhu y quila-maxquiyáhu lanca tapaxuhuán acxní ccalacapas-tacán.

⁵ Hasta lata cticháhu nac xapulataman Macedonia nitucu a akatziyanca cjaxáhu porque latachá nícu canáhu ankalihiná ni quincacuexilh-putuncanán, quincaputzastalacanán, y akatiyuj lay quinacujcán caj lata claklhpecuanáhu huantu naquincaakspulayán. ⁶ Pero Dios lakin cama kapaxuhuay huanti talipu huamánalh, pus xlá quincamacaminín Tito laqui xlá naquinca makapaxuhuay. ⁷ Ni caj xmanhuá luu clipaxúhualh cumu para xlá quincalakchín, huata huá atzinú luu quincalimakapaxuhuán porque nachuná luu xpaxuhuama caj mimpalacatacán; xlá quincalitakalhchuhuinán lata lácu akatiyuj layátit porque ni catziyátit para tlan clamánuáhu, nachuná quincáhuanín pi lacasquinátit pi tuncán xaccalakanchán. Huá xpalacata luu atzinú quincalimakapaxuhuán.

⁸ Masqui xlícaná ccatziy pi amá quincarta huantu aquit pulh cticatzoknín y cticacanichán luu snun calimakalipu huán porque lhuhua huantu ccalihuanín, huantu quilacata ni para tzinú clacpuhuán para pi nichuná xacticahuanín. Acxní acu ccatzoknunikón xaclacpuhuán pi max lan naccamakalipu huanán, pero tamá talipu huán nimakas quilhtamacú titaxtukolh. ⁹ Lanchú luu clipaxuhuay ni xlacata cumu caj ccalimakalipu huán, huata huá clipaxuhuay porque tamá mintalipu huancán camaktayán laqui nalakpaliyátit xalixcájnit

milatamatcán nac xlacatín Dios. Huixinín xlilipuhuampátit mintalakalhincán chuná cumu la lakatiy Dios, huá xpápacata clihuán pi amá quincarta huantú ccamalakachanín nitú ccalimalaktzankén huata tlán camacuanín.

10 Porque amá talipuhuán xpápacata talakalhín huantú Dios lakatiy napatiyáhu xlícaná quincamaktayayán nalakpaliyáhu xalixcánit quintalacapastacnicán nac xlacatín Dios laqui xlá tlán naquincamatzankenaniyán y naquincamaxquiyán laktáxtut. Pero huanti caj lihuaca tzucuy talipuhuán huantú uú xala caquiltamacú xlícaná pi taamánalh talaktzankatayay, porque ni akatiyuj talilay xtalakalhincán huantú tlahuanít nac xlacatín Dios.

11 Huixinín tayánítit makatlajátit mintalipuhuancán chuná cumu la lakatiy Dios, y Dios camaktayanitán, camaxquín litlihueke laqui namaxokoniyátit amá chixcú huantú tlahuanít lixcánit talakalhín nac milakstipancán. Porque snun xcámaxaninitán huá luu xlisitziniyátit, y cumu ni xcatziyátit lácu luu natlahuayátit laata nalacaxtlahuayátit aquit quilakalhasquihu y lata tu ccahuán nálimaxokoniyátit ni akatiyuj lilátit huata chuná tlahuátit, tamacxtútít amá chixcú huantí tlahuanít talakalhín y mapatinítit. Antá stalanca lítasíyulh pi huixinín ni xmaklicatziyátit laata tu tláhuahl nitlán.

12 Acxní aquit ccamacanichán amá quincarta, ni huá clítzokli laqui caj naclimamaxaniy amá chixcú huantí tlahuanít talakalhín huata huá ccalitzoknunín laqui caj naccalitzaksayán para xlícaná luu quilalipahuanáhu y tlahuayátit

huantu aquit ccalimapeksiyán. ¹³ Pero cumu xlicána ctalulokui pi quilalipahuanáhu ątzinú clikalhiyáhu tapaxuhuán nac quilatamatcán.

Pero mäs clipaxuhuanítáhu porque Tito luu kalhiy tapaxuhuán cumu huixinín maktayátit laquí nitucu natzankaniy; xlicána pi lata tu tlahuayátit aquit luu clipaxuhuay. ¹⁴ Aquit ccatziy pi ni cakskáhuilh Tito acxni cuánlh pi huixinín luu tlán mintapuhuancán. Xlihuak huantu aquit ccalimakalchuhuinítán huá xtalulóktat, chuná cumu la cuánlh Tito pi aquit luu clipaxuhuay lata huixinín lapátit. ¹⁵ Xlá luu cañá lipaxúhu calakca-tzalacanán acxni lacapastaca lácu kalhakaxpáttit lata túcu xlá calimakalchuhuinín, xahuachí lácu akatiyuj xlapátit acxni calakchán porque xlacas-quinátit nacatziy pi lipahuanátit. ¹⁶ Nachuná aquit clipaxuhuay porque ccatziy pi ni caquinti-lalimamaxaníhu nac milatamatcán y na tlán ccalipahuanán.

8

Pablo lacasquín pi lipaxúhu catamástokli acatzunín xtumincán

¹ Natalán, chú aquinín ccalitakalhchuhuinán la ta Dios camaqquinít xatlán xtalacapastacnicán amakolh quinatalancán huantu talipahuán Jesús xlicalanca nac xapulataman Macedonia. ² Mäsqui xlicána pi lhuhua talipahuán huantu ankalhiná calakchín pero xlacán ni tataxla Juaniy huata luu lipaxuhu lata talamánalh; y mäsqui xlicána pi luu lacpobre, acxni cahuanicán pi súluj natatlahuay xtumincán laquí natalimaktayaninán, lipaxúhu

tamastay lámpara luu lacrrico. ³ Aquit tlán cmaluloka pi xlacán ni chalakcatzanaj tamastay huantú takalhiy porque acatunu tamastay hasta huantú ni tamakaakchán. ⁴ Maklhuhua quintahuánilh xlacata pi caccamáxquilh talacasquín catalimaktáyah huantú takalhiy amakolh cristianos huanti tahuilánalh nac Jerusalén. ⁵ Pero ni caj xmánuá talitamáxtekli huantu xtamastay, sinoque puñh huatunín tatamacamástalh nac xlacatín Quimpuchinacán y acalistán chú quincáhuaniñ pi naquincámkayayán nac quintascujutcán para huá chuná lacasquín Dios. ⁶ Huá xpápacata acxní cucxilhui huantú xtamastokkónit amakolh quinatalancán xalac Macedonia, aquinín clisquiníhu litlán Tito laqui huá ná camaakaspútulh nac milakstipancán huantú xlá xmáquiltzuquinit lata namaklhtinantilhay huantú huixinín nacalimaktayayátit amakolh cristianos xalac Jerusalén. ⁷ Lacaxtum calichuhuinancanátit pi huixinín tlak tancs lipáhuanátit Dios nixachuná xamakapitzín, tlak tlán masiyuyátit xtachuhuín porque tancs lakapasátit xtalacapastacni, para aktum tlán tascújut tlahuaputunátit y nilay makantaxtiyátit ni tuncán lakachipiniyátit, xahuachí nachuná calakalhamanátit catihuá cristianos chuná cumu la ccalimakalchuhuininitán. Pus cumu chuná quitaxtuy, chú clacasquín pi mas lipaxúhu namastayátit acatzunín huantú nalimaktayaninanátit mintumincán nixachuná amakapitzín.

⁸ Umá huantú ccáhuanimán ni luu ccalima-

peksimán, caj xman clacasquín nacatziyátit lata lácu xamakapitzín cristianos lipaxúhu tamaktaya-ninán, y laqui huixinín na tlán namasiyuyátit pi amá tapaxquit huantü kalhiyátit xlícaná huantü lakatiy Dios. ⁹ Cumu la catziyátit pi caj xpalacata cumu Quimpuchinacán Jesucristo snun quincalakalhamanán, masqui xlá luu rico xuanit porque xlá xpuchiná caquilhtamacú, pero litá-nulh cumu la nitu a cakálhílh caj quimpálacatacán laqui chuná aquinín luu lacrrico nalitaxtu-yáhu porque chú lipaxuhuayáhu lhuhua xtalaka-lhamanín huantü quincamáxquín.

¹⁰ Laqui atzinú naliakpuhuantiyayátit camán camálapacastaciyyán huantü mán timaqUILHTZU-quítit catatá lata acxtum lamachuhuinítit xlacata namastoktilhayátit acatzunín mintumincán, xlícaná pi luu tlán huantü huixinín tlahuayátit. ¹¹ Chuná cumu la xkalhiyátit tapaxuhuán acxni matzuquítit pi ankalhiná chuná cakalhítit tapaxuhuán hasta acxni namqakasputuyátit tamá mintascujutcán. ¹² Porque amá cristiano huantü xlícaná lilakachixcuhui putún Dios huantü maktasiyutilhay, Dios lipaxúhu makamaklhtiy xlilakachixcuhui huantü lacpuhuán pi tayaniy namastay, porque Dios ni quincamaksquinán huantü xlá catziy pi ni kalhiyáhu.

¹³ Umá quintachuhuín ni huamputún pi caj xlacata cumu nacamaktayayátit xamakapitzín cristianos huantü ni takalhiy tu tamaclacasquín huixinín naliqUILHTZINCÁTIT, ¹⁴ huata caj xman talacasquín pi acxtum nalalakalhamanáhu, porque lanchú huixinín kalhiyátit huantü xlacán

ni takalhíy, pero namín quilhtamacú acxni xlacán takalhíy nahuán huantú huixinín ni catikalhítit entonces natasiyuy pi acxtum lalakalhamanátit porque ná nacamaktayacanátit acxni nitú úu namaclacasquinátit. ¹⁵ Chuná naquitaxtuy cumu la huan nac xtachuhuín Dios: “Amá huanti lan xmakalananátit ni akataxtúnih huantú xmaclacasquínit, ná nipara huanti ni lhuhua xmakalananátit nitú tzankánih huantú nalihuayán.”

*Pablo malakachamapá Tito nac xacachiquín
Corinto*

¹⁶ Cäna cpaxcatatziniy Dios pi xlá máxquiil tlán talacapastacni quintalacán Tito laqui ná nacaaklihuánan chuná cumu la aquit ccaaklihuánan. ¹⁷ Acxni aquit cuánih pi xtláhualh litlán xcälakapaxialhnamparán xlá aya xlacapas-tacnít huantú caj sacstu xlacata pi nacälakapa-xialhnánan porque catziputún para tlán lapátit.

¹⁸ Na acxtum ctamacamachá Tito chatum quintalacán huanti luu xatalipáhu y lacaxtum antanícu lipáhuancán Jesús luu huancán pi tancs laata liscujma xtachuhuín Quimpuchinacán. ¹⁹ Xahuachí huatunín canajlanín talácsacli laqui naquincamakamtayayán latachá nícu aquinín nacanáhu liscujáhu umá tascújut huantú ctlahuamanáhu laata cmamacxtumimanáhu acatzunín tumín laqui natasiyuy pi xlícanalakalhamaninanáhu y chuná lilakachixcuhuimanáhu Quimpuchinacán Jesús. ²⁰ Xahuachí aquit clakatiy laata quincamaktayamán porque cumu lipáhuancán ni clacpuhuama para xamaktum naquincaliaksanachán para nahuán pi huí tu

cakskahuixtúhu umá tumín huantú clemañáhu nac Jerusalén. ²¹ Huá xpälacata aquinín ankálhíná clatzaksayáhu ctlahuayáhu huantú tlán tascújut, chuná nac xlacatín Dios xahua nac xlacatincán cristianos.

²² Y ná ccáhuaniputunán pi ná catáamachá Tito chu xcompañeros acháumlitúm quintalacán huanti aquinín cucxilhnítáhu chunatá lata quinticapektanún luu akstíum quincatascujmán, xlá luu paxúhualh acxni cátzilh pi naanán calakapaxialhnánán porque aquit clíatchuhuinanit lata lácu kalhiyátit tacanájlat, y lácu súluj tlahuayátit mintumincán huantú limaktayananátit, huá xpälacata chú luu ya tapaxuhuán camaktayaputunán. ²³ Para tícu catziputún túcu xpälacata cilacsacnít Tito laqui huá nacalakanachán milicatzítcán pi caj xpälacata porque umá chixcú huanti lán quimaktayama nac xlitascújut Dios y ccatziy pi nachuná nacamaktayayán nacalimacuaniyán antá; y chinchú amakolh lacchixcuhuín huanti tataamánalh huá man tamalakachanit minatalancán huanti talipahuán Jesús y talamánalh nac lactzu cächiquín uú lacatzunín. Umakolh lacchixcuhuín talilakachixcuhuimánalh Dios caj xpälacata xtascujutcán. ²⁴ Laqui xlihuak cristianos natacatziy pi luu calacsacmacancanitanchá umakolh lacchixcuhuín huixinín cacapaxquítit y cacamaktayátit laqui natasiyuy pi aquinín xlicana quincaminiyán nacpaxuhuayáhu caj mimpalacatacán porque tlán catziyátit y paxquinanátit chuná cumu lá lipahuanátit

Quimpuchinacán.

9

Pablo lacasquín pi aktum tapaxuhuán catamástalh xlimosnajcán

¹ Natalán, xlicana pi niaj xafuerza naccamalaca-pastacniyán xlacata nacalimaktayayátit huantú kalhiyátit amakolh cristianos xalac Jerusalén huantí talipahuán Jesús. ² Porque huixinín ankalhiná ya tapaxuhuán maktayaninanátit y ccalitakalhchuhuínalh quinatalancán xalac Macedonia pi hasta catabá huixinín xalac Acaya tzucunitátit mastokátit acatzunín mintumincán huantú nalimaktayaninanátit, y acxni xlacán tacátzilh huantú tlahuapátit, na talalimakalh-chuhuínalh pi na natamastoktilhay acatzunín xtumincán huantú natalimaktayaninán. ³ Huá xpälacata ccalimacamachá umakolh natalán laqui nacamauxcaniyán y namaqasputuyátit huantú aya maquilhtzuquinitátit laqui ni natamaxaniyátit porque acxni aquit ccalichuhuinanán cuan pi xlicana lakanayátit maktayaninanátit. Chuná ccáhuanimán laqui na aya naquilalikalhitahuilayáhu, ⁴ porque para xamktum acxni nacanachá nac mincachiquincán naquintataán makapitzín cristianos uú xalac Macedonia y para huixinín ni mastoknitátit nahuán huantú nalimaktayaninanátit, xlicana pi lanca límaxana naquincáquitaxtuniyán porque maklhuhua lata ccalichuhuinanitán pi lipaxúhu maktayaninanátit. ⁵ Pero laqui nitú litamaxaniyátit huá xpälacata aquit

ccalisquínihl litlán umakolh natalán xlacata pi cacalakapaxialhnán laqui nacamauxxcaniyán y maktumá namakasputuyátit huantú timaquilhtzuquipítit, y chuná natasiyuy pi huixinín chapaxuhuana mاستayátit huantú kalhiyátit, y ni huata caj nalitasiyuy pi huixinín caj xalacpilhín y masqui maktayaninanátit xafuerza porque aquit luu ccāliakaxculimán.

6 Cumu la huixinín catziyátit pi huanti ni lanca chananán ni lhuhua makalananán; pero huanti lanca chananán lhuhua makalananán.

7 Luu camininiyán pi minacujcán nakalhasquinátit laṭa lácu tlān nalamktayaninanátit huantú kalhiyátit, pero nitu chasitzi namastayátit o chalakcatzanaj camástalh porque Dios lipaxuhuay huanti ya tapaxuhuán mاستay huantú kalhiy.

8 Dios lakaniy nacasiculanatlahuaniyán mintascujutcán laqui atzinú lhuhua nakalhiyátit nixachuná huantú mastapátit laqui mas nakalhiyátit y nitu nacatzankaniyán y chuná tlān lipaxúhu nacalimaktayayátit xamakapitzín cristianos huanti ni takalhiy huantú tamaclacasquín nac xlatamatcán.

9 Porque lacatum nac xtachuhuín Dios huantú tatzoktahuilanit nac likalhtahuaka chiné huán xpalacata chatum tlān cristiano:

Xlá lipaxuhu camaakpitziniy acatzunín huantú kalhiy lacpobres,
y umá xtapaxquit nēcxnicú catipatzankácalh nac xlacatín Dios.

10 Cumu Dios huanti mاستay lichánat huantú chancán xahua amá quintahuajcán huantú lihuayanáhu, pus na huatiyá tamá Dios nacamaxquiyán xlihuak milichanatcán huantú namacla-

casquinátit y namastacay laqui nítu nacatzankaniyán y chuná huixinín mäs kalhiyátit nahuán huántu tlán nalamktayaninanátit. **11** Chuná chú xlíankalhíná nacaqakataxtunitlhayán huántu lipaxúhu nacalimaktayayátit lacpobres cumu láti xalac Jerusalén. Y xlíhuák amá acatzunín mintumincán huántu huixinín namacamastayátit nac quimacancán laqui aquinín naccamakpi-tziniyáhu laklimaxkenín, chuná amakolh cristianos luu natalipaxcatcatziniy Dios amá mintataincán huántu natamaklhtinán. **12** Porque acxni aquinín naccaleniyáhu umá tamaktay amakolh natalanín, ni caj xmanhuá cacticaleníhu huántu nacalimacuaniy nac xlatamatcán y antiyá naquitayay quintascujutcán, sinoque xlacán lhuhua huántu natalipaxcatcatziniy Dios porque caakli-huamáca natamaklhcatziy. **13** Natalilakachixcuhuiy Dios caj xpàlacata huántu nacalimaktaya-yáhu porque xlacán natataluloka pi xlícaña huixinín huá mäkantaxtipátit xlimapeksín Cristo. Ná natalipaxcatcatziniy Dios porque huixinín akxapaj layátit lata mastokátit acatzunín huántu kalhiyátit laqui caj mintapaxuhuancán nacalimaktaya-yátit latachá tícuya cristiano. **14** Xahuachí anka-lhiná ya tapaxuhuán natakalhtahuakaníy Dios caj mimpalacatacán porque Dios cámäxquinitán tlán talacapastaci lata lipaxúhu namaktayaninanátit. **15** Luu capaxcatcatziníhu Dios caj xpàlacata lanca xtalakalhamanín huántu quincataín nac xlatamat Jesucristo.

Pablo kalhiy limapeksín porque xlá ná apóstol

¹ Chú huí aktum lanca litlán huántu aquit Pablo ccasquiniputunán, pero huántu lacatitum porque ccapaxquiyán chuná cumu la capaxquiyán Quimpuchinacán Cristo, y nichuná claputún cumu la tahuán makapitzín huánti quintaliyahuay pi acxní cuilachá nac milakstipancán ni marí cchu-huínán caj lámpara ccaquilhpecuaniyán, pero acxní caj ccätzokniyán quincarta huántu ccamacaniyachán mat luu lipecua laṭa ccahuaniyán cumu mat caj mákat cuij. ² Huá xpalacata ccalimākatzankeyán, acxní aquit naccalakanachán ni clacasquín para tícu caj natzucuy quintala-huaniy o naquilitzaksaputún, porque aquit naccatalahuaniy xlíhuak huánti catuhuá quintaliyahuamánalh porque tahuán pi huántu aquit cli-chuhuínán caj quecstu quintalacapastacni. ³ Xlicana pi aquit ná caj la catihuá chixcú huánti uú xalac caquiltamacú, pero niṭu cli-chuhui-namenáhu huántu caj quecstucán quintalaca-pastacnicán cumu la tatlahuay makapitzín cristianos laqui nacalipahuancán. ⁴ Umá quilimacahucán huántu aquinín ckalhiyáhu ni antá uú xala caquiltamacú sinoque huá xlímakatlihueke Dios aquit clitayaniy, porque huá tlán camakatlajay xlíhuak huánti ni talipahuán y ni taucxilhputún. Y aquinín ná tlán naccalimakatlajayáhu amakolh huánti quincamaxtuniyán taaksanín, ⁵ y xlíhuak amakolh huánti ankalhíná talacputzamá-nalh xlacata ni nalipahuancán y ni nalakapascán Dios, xahua xlíhuak amá talacapastacni huántu uú xala caquiltamacú, nac xmacán Cristo cmak-

xtekáhu laquí huá nacamakalhapaliy y ná natakalhakaxmata huántu nacalimapeksiy. ⁶ Y aquinín aktum ccatziyáhu pi naccalimapatiniyáhu xlilhueke Dios xlíhuák amakolh huanti caj takalhakaxmatmakamánalhcú xlimapeksín Dios nac milakstipancán. Pero ní xaakpuntum chuná cacticatláhua huata pulh lacatancs naccatziy tícu luu xlicana naquinkalhakaxmata y tícu caj naquintatalálacataquiy.

⁷ Makapitzín huixinín nítu quilaliucxilháhu porque caj xmanhuá ucxilhátit huá lata ctasiyuyáhu y ní huá la ta ckalhiyáhu quinacujcán, pero para xlicana talulokátit pi lipahuanátit Dios y huá tapeksiniyátit Cristo, ná milicatzitzcán pi aquinín ná huá ctapeksiniyáhu Cristo.

⁸ Porque masqui calacpuhuántit pi acatunu aquit clílacataquinán cumu tlán ccalimapeksiyán huántu militlahuaticán, nípara huá clímaxanán; kalhtum cuan pi ní clímaxanán porque Cristo ní huá quilimaxquinít umá limapeksín laquí caj naccalilactlahuayahuayán, huata huá quilimaxquinít laquí caj naccamaktayayán lácu lihuaca akstítum nalipahuanátit. ⁹ Ní clacasquín nalacpuhuánátit para caj ccalimakeklhamán quintachuhuín huántu ccätzóknimán nac quincarta. ¹⁰ Lhuhua huanti tahuán pi acxni ccätzokniyán mactum carta lhuhua quintachuhuín huántu caj ccälilacaquilhnijyán y ccalimakeklhayán; pero mat acxni chú cuilachá nac milakstipancán ní lhuhua quintachuhuín, xahuachí mat ní tlhueke cuiliy quilimapeksín caj lámpara mat ccaquihpecuaniyán. ¹¹ Pero

xlihuak amakolh lacchixcuahuín huánti chuná quintalichuhuinán tancs catacátzilh pi chuná cumu la acxni mákat cuilanáhu y caj xman ccatzokniyán quincarta nípara tzinú cquilhpécuán huantu ccálimapeksiyán, pus nachuná ni cactiquilhpécua xlacata naccamákalchuhuiníyán acxní cuilachá nahuán nac milakstipancán.

¹² Aquit nípara tzinú clacpuhuán para xaccata-talacástucli o hasta para xacmalihuáquih quintalacapastacni nixachuná cumu la tamakolh huánti caj xman sacstucán talacputzamánalh lata lácu tlak talipáhu xakchuhuinánín Dios natalitaxtuy. Xlicána pi luu lactonto porque caj xman chuná talilacataquínantlahuán para tícu tlak kalhiy o makaacchán xtalacapastacni. ¹³ Porque aquinín nitú camanáhu lilacataquínanáhu quintalacapastacnicán sinoque huá tlán quincalilakapascanán quintascujutcán lata xatúcu Dios lacasquinít nac-tlahuayáhu, chuná cumu la xlá lacasquinít pi nacscujáhu y naccalimakalchuhuiníyán xtachu-huín huixinín xalac Corinto. ¹⁴ Huá xpala-cata ccálihuaniyán pi aquinín nitú clacatzalamánu huantu Dios quintalimapeksín nactlahuayáhu; osuchí xlacpuhuanátit pi ni ckalhiyáhu limapeksín xlacata naccahuaniyán huantu milit-lahuatcán? ¿Lácu pi ni aquinín huánti pulh ccálixakatlín lata lácu lacasquín Cristo nalipahuanátit y nalatapayátit? ¹⁵ Pero aquinín nitú clilacataquínamanáhu xtascujutcán xamakapitzín apóstoles, o para túcu ctlahuamánáhu huantu ni quincalimapeksinítán Dios. Huata aquinín clacasquináhu pi akstítum calipahuántit Quim-

puchinacán laqui ątzinú mas tlən naccaliscuján chuná cumu la quincalimapeksinitán Quimpuchinacán. ¹⁶ Xahuachí clacpuhuanáhu pi nacanáhu liakchuhuinanáhu umá lipaxúhu xtachu-huín Cristo huantü mastay laktáxtut pekanachá nac mincachiquincán Corinto, antanícu nití a tali-chuhuinán xamakapitzín akchuhuinanín laqui nitü naclilacataquinanáhu xtascujutcán xamakapitzín.

¹⁷ Para tícuya cristiano lakatiy talipáhu maklhcatzicán, mejor talipáhu calimáxtulh Quimpuchinacán. ¹⁸ Pero ni calacpuhuántit para amá chixcú huantí caj lilacataquinán huantü lacpuhuán pi huá tlahuanít ámaj litayaniy; sinoque huá natayaniy amá chixcú huantí Dios nalakatiniy xtascújut huantü tláhualh.

11

Lhuhua huantí caj taliakskahuinán pi talichuhuinán Cristo

¹ Cumu huancán pi mat caj clakahuitima, pus para clakahuitima o nitü clakahuitima huatiyá pi caquilakaxmatníhu huantü ccahuanimán. ² Aquit ccapaxquiyán y lipecua ccalakcatzanán, pero umá talakcatzanín huantü aquit cmaklhcatziy huá Dios quimaxquiy, porque aquit aya ccakalhtinaninitán xlacata natatamakaxtokátit Cristo y clacasquín pi xm̄anhua xlá miliitcán natlahuayátit laqui aquit tlən naccamacamastayán cumu la chatum tzumat huantí nitü titlahuanit talakalhín huantü nalimaxananiy xlíit huantí ámaj

tatamatkaxtoka. ³ Aquit clacasquín pi xmanhuá napaxquiyátit y nalipahuanátit Cristo, pero acatunu clacpuhuán pi chuná cumu la akskahuiní tiakskahuimílh amá xapulh puscáat huantí xuanicán Eva xlacata nakalhakaxmatmakán Dios, huixinín nitú tikalhakaxpatmakanátit y nitú nacaakskahui Miyán tamá akskahuiní. ⁴ Chuná ccahuaniyán porque huixinín huak matlantiyátit nacalakchinán catihuaj chixcú y natzucuyán caliakchuhuinaniyán tunu laktáxtut pero nichuná cumu la aquinín ccalimakalhchu-huininitán laktáxtut huantú mastay Jesús, na calimakalhchuhuinicanátit pulactum espíritu huantú nacamaxquiyán litlihueke mat nixachuná huantú camaxquiyán Espíritu Santo, y tuncán lipahuanátit xtachuhuínncán nixachuná cumu la lipahuanátit amá xtachuhuín Cristo huantú aya makamaklhtinanitátit. ⁵ Pero ccahuaniyán pi ni clacpuhuán para atzinú takalhiy tlán talacapastacni tamakolh aksaninanín huantí talitaxtuy laclanca apóstoles y huantí huixinín calipahuanátit. ⁶ Masqui xlicana pi lhuhua huantí tahuán pi aquit nilay cchuhuinán, pero tlán lihuana cmalacaputuncuhuiy huantú clichuhuinama xatlán talacapastacni, y huixinín tlán malulokátit porque acxní xaclamanáhu nac milakstipancán chuná xacliscujmánaáhu cumu la xacchuhuinamanáhu.

⁷ Acxní aquit ctzúcuh calimakalhchuhuinaniyán xtachuhuín Dios ni xaclacpuhuán para luu lactalipahu nacamaklhcatzicanátit, ¿osuchí huá chuná calimaklhcatzicántit porque nitú ccamatajín la ta ccamakalhchuhuinín? Apoco

lacpuhuanátit pi ctláhualh talákalhín cumu aquit ni talipáhu clitáxtulh nac milakstípáncán?

⁸ Huata aquit cmatlántilh naquintalimaktayay huantú takalhiy cristianos alacatúnúj xalanín laqui niitu naquintzankaniy y tlán akstítum naccaliscuján naccamákalchuhuiniyáñ. ⁹ Y acxni xacuilachá nac milakstípáncán para túcu xquintzankaniy huantú xacmaclacasquín, nipara chatum tícu huixinín ccalimaakatzankén, porque acxni tachilh amákolh natalán xalac Macedonia xlacán quintamáxquilh actzú tumín huantú naquili macuaniy, y acxni cmakásputli huantú xlacán xquintamaxquinít aquit niitu ccámaksquín para túcu naquili limaktayayáhu; y clacpuhuán pi necxnicú cacticalimaakatzankén para naquili limaktayayáhu tumín. ¹⁰ Chuná cumu la ctaluloka pi xlicána clipahuán Jesús náchuná ctaluloka pi nipara chatum cristiano caquintilactlahuánilh quintapaxuhuán laña ccaliakchuhuínaniy cristianos xalac Acaya xtachuhuín Cristo y nipara aktum centavo ccámatajíy. ¹¹ Xamaktum para nalacpuhuanátit pi caj ni ccalakalhamanán huá xpápacata chuná ccalihuaniyáñ pi ni clacasquín naquila maskahuiyáhu, pero Dios stalanca catziy pi aquit xlicána snún ccalakalhamanán.

¹² Pero ccahuaniyáñ pi chunatiyá naccamákalchuhuiniy cristianos xalac mincachiquincán y ni cacticamatájilh, laqui ni natalacpuhuán tamakolh huanti talitaxtuy apóstoles pi aquit ctlahuay xtascújut Dios cumu la xlacán tatlahuamánalh.

¹³ Pero tancs ccahuaniyáñ pi ni huá Dios

camacaminít tamakolh lacchixcuhuín huánti cahuaniyán pi ná huá xapóstoles Cristo, caj xaaksaninanín huánti taliakskahuinín xtachuhuín Dios. ¹⁴ Nípara tzinú calacpuhuántit para ni cäna huántu ccahuanimán porque hasta mismo akskahuiní acxní calactlahuayáhuay lacuán cristianos litaxtuy cumu la chatum xángel Dios huánti maxquínít xtaxkáket. ¹⁵ Cumu mismo akskahuiní litaxtuy cumu la xángel Dios, pus xlihuák huánti tatascujmánalh akskahuiní ná tlán talitaxtuy cumu la lacuán cristianos, pero tancs ccahuaniyán pi nachán quilhtamacú natalatzankatayay chuná cumu la nalaktzankay xtascujutcán.

Pablo lichuhuinán xtalipuhuán huántu kahiy chatum apóstol nac xtascújut

¹⁶ Lanchú ccahuniparayán pi nípara chatum tícu calacpúhua para aquit caj clakahuitima; pero masqui chuná calacpuhuántit pi aquit clakahuitima pus caquilakaxmatníhu tzinú quintachuhuín porque ná tlán naclilacataquínán quintascújut chuná cumu la xlacán tatluhauay. ¹⁷ Umá huántu camán cahuaniyán ni huá quilimapeksinít Quimpuchinacán, pero chuná camán cahuaniyán cumu huixinín huanátit pi aquit caj clakahuitima y ná tlán chú naclacataquínán ¹⁸ chuná cumu la talilacataquínán makapitzín huántu tatluhauay xtascujutcán. ¹⁹ Koxutacú tihuanátit huixinín, porque litaxtuyátit pi luu lakskalalán pero matlantiyátit lata cakalhakaxpatátit huantu talichuhuinán tamakolh huánti talilakahuititlahuán

xtachuhuín Dios, ²⁰ huak matlantiyátit lata calimapeksiyán nacaliscujátit y camaxquiyátit min-tumincán laqui natalipaxuhuay, pero nítu huanátit mäsqui cámakkalhañancanátit, y hasta calakaxicanátit nac milacancán. ²¹ Mäsqui xlícaña pi aquit ní ckálhilh litlihueke xlacata chuná naccaliaksihuimiyán cumu la xlacán tatluhamánalh.

Pero para tamakolh aksaninanín talilacataquínán huantú tahuán pi taliscujnittá pus aquit na cámaj lilacataquínán cumu la chatum lakahuiti huantú aya ctiliscujnit chu huantú ctilipatinit. ²² Para xlacán talilacataquínán cumu judíos pus aquit na judío; para tlancaj cámaklhcatzicán cumu israelitas pus aquit na israelita; osuchí huá talichixcujnún cumu huá xlitalakapasnicán xamákán kolutzín Abraham pus na xlitalakapasni Abraham aquit. ²³ Para huá talilacataquínán cumu talacscujnimánalh Cristo pus atzinú aquit tlak clacscujninitá nixachuná cumu la huatunín. Mäsqui cahuántit pi clakahuitima porque clilacataquínama huantú ctilipatinitá caj xpälacata Cristo xlícaña ccáhuaniyán pi maklhuhuatá quilitamacnucán nac pulachin nixachuná cumu la xlacán; cmakasitzinán y quiliaklhchas-nokcanit caj huá xpälacata Jesús, xáhuachí maklhuhua quimaknipayuncanit. ²⁴ Aya xlimakquitzis lata xanapuxcun judíos quintamacamás-talh y tamapeksinalh laqui makpuxamacunajatza naquilikesnokcán latigo. ²⁵ Maktutu quiacnicchipacanit, maktum caj quiliactalanchipáca chí-huix. Xlimaktutu talakaspita y laktzankay nac chúchut amá barco huantú xacpuamánáhu, y

maktum quilhtamacú aya xacjicsuay, maktum nac pupunú tantacú y tantascaca antá cpátílh laṭa caj xacxquihuatnán xacchipama paktum qui-hui. ²⁶ Lacalhuhua antá nícuā cquichanít laka-chunín aya cmuxtuy nac kalhtuchoko; quintalipa-taxtuy y quintamaknipaytún kalhānanín; quintasí-tziniy y quintamaknipaytún quinatachiquín xahua huantí xala mákat. Måsqui nac cachiquín acatunu quintamaknipaytún, xahua nac catuhuán chu nac pupunú nícajcu calinín cquitayanít; y acatunu quintamapatiníy amåkolh aksaninanín huanṭi tahuán pi ná huá Cristo talacscujnimá-nalh. ²⁷ Lhuhuatá laṭa túcu ctılıscujli, pero ná lhuhua huantú clitaaklhuhuiy, acatunu hasta ní clhtatay caj laṭa cscujma; laná cpátiñit tatzincsni xahua takalhpüti; acatunu makás ní cuayán; laná cpátiñit calonkni; y acatunu hasta nítu quilhákät huantú naclilhakänán.

²⁸ Pero måsqui lhuhua huantú aquit clipatiña caj huá umá xpälacata chunatiyá chäli chäli aka-tiyuj clilay laquí lihuana y akstíum xtalatámålh amåkolh cristianos huantí talipahuán Cristo laṭa nícuā cachiquín. ²⁹ Para chatum cristiano taxlajuaníy nac xlatámatl aquit clilipuhuán xtaxlajuánit, y para tícu lactlahuayahuay chatum cristiano huantí lipahuán Cristo aquit ná quimakalipuhuán. ³⁰ Aquit ní clakatiy clacataquinán pero acxní clichuhuinán huantú aquit ctitlahuaniítá caj xmånhuá clichuhuinán laṭa Dios qui-maktayanít laquí tlán nacllahuay huantu quecstu nilay xactlahuay. ³¹ Dios huantí xtlat Quimpuchinacán Jesucristo y huantí caj xmånhuá sac-

stu mininiy canecxnicahuá nalakachixcuahuicán stalanca catziy pi huantú aquit cquilhuama huá xtalulóktat y nítu caksaninama. ³² Dios ná quimaktáyalh amá quilhtamacú acxní xacanít nac Damasco, porque amá gobernador huanti lacxtum xtamapeksinán rey Aretas camapéksilh xtropa laqui natamaktakalhnán nac tlancátiyi antanícu xlactanucanachá nac cachiquín laqui naquintachipay y naquintatamacnuy nac pula-chin. ³³ Pero acxní tacátzilh natalán huanti antá xalanín tuncán quintahuánih y quintamaktáyalh laqui tlán nactzalay, xlacán quintamájulh nac patum lanca pekxu y lakasiyu quintalacmáctilh nac aktum ventana xapátzaps huantú xlistilimpacanít cachiquín, aquit ctzálalh y ni quintachípalh amakolh tropa.

12

*Pablo lichuhuinán huantú Dios
limálacahuaninit*

¹ Masqui ccatziy pi ni quimininiy para chuná nautilusacataquínán quintascújut huantú ctitlahuanit, pero cumu juerzaj quiltiláhuat huá chú naclichuhuinán huantú Dios quilimalaca-huaninit. ² Chiné quilhtamacú xliakcutati cata laṭa Dios quílel nac xliquilhmactutu akapún, ni ccatziy para xachatumínica quílel osuchí caj quilistacni tílel, xmán Dios catziy. ³ Cumu la ccahuanimán ni ccatziy para xachatumínica quintiléncalh osuchí caj quilistacni, porque caj xmánuá Dios catziy. ⁴ Pero ccatziy pi quiléncalh nac amá calilakátit pulataman antanícu huilachá

Dios, y stalanca ckáxmathli lacuán xtachuhuín Dios huantú nipara chatum chixcú a mākaxmatacán, y nipara mininiy natalichuhuinán. ⁵ Xlicana pi caj xpälacata huantú Dios quimasiyuninít y quimākaxmatanit tlān xaclilacataquínalh, pero ccatziy pi nichuná quilitláhuat, huata acxní clichuhuinán o clilacataquinán huantú aquit ctitlahuanittá, caj xmān cuan huantú Dios quilimaktayanit acxní xactaxlajuaniy. ⁶ Pero para xaclilacataquínalh quintascújut ni caj lakahuiti xquitáxtulh, porque huantú xacuá huá xtalulóktat; pero nichuná clacataquinán laqui niti nahuán para aquit marí cchuhuinán pero nitucu quinkasat. ⁷ Pero laqui nitú naclilacataquinán huantú quilimalacahuaníca Dios tlān tláhuall nackalhíy nac quimaci aktum tacatzanájuat huantú canecxnicahuá naquimapañiy, umá tapatín huantú ckalhiy xlicana pi huá malacatzuquinit aksahuini. ⁸ Xlimaktutu aquit clisquiniy Dios xlacata pi catláhuall litlán caquimakltilhá tapatín para xlá chuná lacasquín. ⁹ Pero Dios chiné quinkalhtiy: “Clacasquín nacatziya pi xlicana cpaxquiyán y chapaxuhuña capati mintalipuhuán chu mintacatzanájuat; porque aquit climasiuy quilitlihueke nac xlatamātcán huantí lacxlajua y ni laktlihuekén, pero huantí quintalipahuán.” Huá xpälacata luu clipaxuhuay pi aquit xlajua ckalhiy quilitamat porque ccatziy pi chuná Dios limasiyuma xlitlihueke nac quintaxlajuanit. ¹⁰ Caña clipaxuhuay pi aquit xlajua quilitamat cumu la acxní ccatziy pi nilay túcu ctlahuay

quecstu para ni huá Dios naquimaktayay, chuná cumu la acxní quilikalhkamanancán, o acxní para túcu cmaclacasquima y nítu ckalhiy, chuná para quimputzastalamácalh, osuchí xlihuák amá taaklhúhuit huantú quilakchín caj xpápacata cliakchuhuínán xtachuhuín Cristo, huá xpápacata clihuán porque acxní luu ątzinú xlajua cmaklhcatziy nac quilatámät xlícaña pi huata acxní tlak lhuhua quimaxquiy Dios xlítlihueke.

Pablo lipaxúhu caliscuja xlihuák cristianos xalac Corinto

¹¹ Xlicána pi láná clílacataquínalh quintascújut huantú aquit ctitlahuanít cumu la chatum lakahuiti, pero huák huixinín quilamakstuntlahuáhu, porque huixinín xcalakchánán tancs nalichuhui-nanátit huantú aquit ctíliscujnittá pero huata nichuná tlahuátit. Másquí chú lacpuhuanátit pi aquit nítu clímacuán pero huá Cristo quilacsacnít laquí naclitaxtuy xapóstol, nixachuná cumu la tamakolh aksanimanín huantí huixinín calipahua-nátit y huantí tahuán pi xlacán ná apóstoles. ¹² Stalanca taluloknít pi xlícaña aquit xapóstol Cristo porque xlá lhuhua camaxquinítán xaliucxilhtiyat laṭa quimatlahuaníñit laclanca licácnít tascújut nac milakstipancán, lipaxúhu ccalimakalchuhui-ninitán xtachuhuín Dios y ccamatlantinit tatallanín. ¹³ Caquilamatzankeñaníhu para camán calacataquiyán o para camán camañasitziyán, porque camán cakalhasquinán: ¿pi huá cahuá ni quilalipahuanáhu caj xpápacata pi aquit cmat-lantinit naquintalmaktayay actzú tumín huantí

alacatúnuj xalanín cristianos, laqui nítu naccalimáqatzankeyán huantú nacmaclacasquín?

¹⁴ Chú aya ctzucunít tacaxa laqui naccalaka-nachán xílmaktutu, pero ná nipara lanchú cacticálimaakatzankén huantú aquit nacmaclacasquín chali chalí quintahuá. Porque lacatancs cca-huaniyán pi aquit ní huá ccámaputzatílhayán huantú huixinín kalhiyátit mintumíncán, sinoque huixinín ccáputzatílhayán laquí akstítum nalipa-huanátit Dios. Porque huixinín stalanca catziyátit pi huá lacchixcuhuín tamakscujtiyay laqui nacamauiy xcamanán, y ní huata huá xacamanán namakscujtiyay laqui natamahuiy xtlatcán. ¹⁵ Y caj laña cpaxuhuay ccaliscuján tlán naccalima-kalchuhuiniyán xtachuhuín Dios hasta laña nícu nacquitayay laqui huixinín líhuana naakataksátit lácu tlán nalakmaxtuyátit milistacnicán; masqui tancs tasiyuy pi acxní atzinú aquit ccápaxquiyán huixinín caj quilaſitziniyáhu y quilaſalakmakanáhu.

¹⁶ Xlicana pi acxní xaclamachá nac milakstípāncán huixinín stalanca catziyátit pi nítu ccalimáqatzankén para huantú nacmaclacasquín, pero makapitzín tahuán pi max chuná ctláhuah laqui tlán tzek naccákskahuiimaklhtiyán huantú kalhiyátit.

¹⁷ Xlihuák huantí aquit ccamalakachanitanchá laqui nacalimákalchuhuiniyán xtachuhuín Dios, ¿apoco ná naquilahuaniyáhu pi xlacán caákskahuiimaklhtinítán huantú kalhiyátit?

¹⁸ Xlicana pi aquit cmalakachachá Tito xahua chátmumlítum quintalacán huantí ná quincámaktayamán nac quintascujutcán,

¿lácu chinchú, pi caakskahuimaklhtín Tito mintumíncán huántu huixinín kalhiyátit? Aquit ccatziy pi Tito nítu cámaklhtímán, porque la Tito cumu la aquit acxtumá clemeñáhu quintalacapastacnicán y lipaxúhu ccámaktayayáhu cristianos mäsqui nítu ccámatajiyáhu.

¹⁹ Xamaktum nalacpuhuanátit pi huá chuná ccalihuanimán laqui naquilitapatiyáhu o naclitalacatlantiyáhu para túcu ccatlahuaninitán. Pero tancs ccáhuaniyán pi ni huá chuná clichuhui-nama, porque stálanca catziy Dios xahua Quimpuchinacán Jesucristo pi chuná ccáhuaniyán laqui mäs akstítm nalipahuanátit Dios. ²⁰ Aquit xlícaná akatiyuj clay pi acxní naccalakanächán para xamaktum ni cactimatlántilh lata lapátit nahuán, y ná nipara huixinín catimatlantítit nac-tzucuyán calacaquilhnijyán. Aquit nitlán cactimaklhacátzilh para lámakasitzihuilátit nahuán, para laqui laquiclhcatzaniyátit, para laaksampátit, para lalacataquipátit, o para tunuj túnu tlahuapátit chatum chatum. ²¹ Porque para chunatiyá ni tamakxtekmánalh xalixcájnit xlatamatcán huanti xtakalhiy, para chalhuhua xlacchajancán o para huanti taakkottamamánalh xahua xlihuák huanti tatluhauay huantu talakalhín, xlícaná pi acxní naccalakanächán lipicua lata naquili-maklipuhuanáhu, y hasta nactasay y naccalimaxanán.

Pablo cahuaniy pi akstítum catalatámálh cristianos xalac Corinto

¹ Cumu lə catziyátit pi para chatiy o kalhatutu testigos tamaluloka pi xlicana tlahuanił talakalhín chatum cristiano, cumu tancs tamaluloka testigos pus ąmá chixcú lakchán pi namapatińicán. Chuná ccahuaniyán porque ná aya xlimaktutu lanchú naccalakanachán. ² Acxni ccäqui-laklachán xlimaktiy ccalihuánilh amakolh huanti nac milakstipancán xtatlahuamánalh talakalhín pi niaj catatláhualh, y xlihuak huanti tatlahuamánalh huantu nntlán alisok ccämäcatziniyán lihuán nia ccalakanachán xlimaktutu, para chunacú lapátit nahuán, tancs ccahuaniyán pi aquit ni cacticatalakatputzán lata naccalihuaniyán. ³ Cumu huixinín lihuana talulokputunátit para xlicana Cristo quimaxquinít xtalacapastacni, pus lacatancs natalulokátit porque nakaxpatátit huantu xlá quilimapeksinít laqui naccalimakalhchuhui-nyán, porque Cristo huanti cäatalamán nac milatamatcán ni caj xaxlajua sinoque kalhiy lanca xlitlihueke y huá namasiyuy nac milakstipancán acxni naccalakanán. ⁴ Mäski xlicana acxni xlá pekextokohuacácalh nac cruz tasíyulh cumu lə chatum huanti ni kalhiy litlihueke, pero chú xastacná lama porque huá lilama lanca xlitlihueke Dios. Nachuná chú quincaquitaxtuniyán xlihuak aquinín huanti tapeksiniyáhu Jesús, porque nitu kalhiyáhu litlihueke cumu lə xlá nitu xkalhiy litlihueke nac cruz, pero cumu Cristo lama nac quilatamatcán ná huá chú lilamanáhu ąmá lanca xlitlihueke Dios huanti quincämaktayayán acxni ccämäkalhchuhui-nyán.

5 Luu lihuana calacapastáctit para xlicana akstítum lipahuanátit Jesús, para aktum macahui-linitátit mintalacapastacnicán. ¿Chímpara caj xmán huanátit pi lipahuanátit y ni lihuana talulokátit? ¡Porque milicatzítcán pi Jesús lama nac milatamatcán! **6** Pero aquit clacpuhuán pi huixinín stalanca ucxilhpátit pi aquinín huantí cliakchu-huínamánu xtachuhuín Jesús ctalulokáhu pi xlicana Cristo lama nac quilitamátcán. **7** Huá xpålacata aquinín ankalhíná ckalhtahuakaniyáhu Dios laqui huixinín niaj tu natluhuayátit tala-kalhín; umá quintakalhtahuakacán huantú ctahuayáhu ni caj xpålacata para nalitasiyuy pi tlán ctlahuanítáhu quintascujutcán nac milak-stipancán, sinoque laqui xlicana huixinín akstítum nalatapayátit. Porque xmánuá clacasqui-náhu pi akstítum nalatapayátit ni quincuentajcán huantú nalichuhuínancán xpålacata quintascu-jutcán. **8** Y masqui nitlán caquincalichuhui-nancán pero ankalhíná huá clacasquináhu cata-yánilh huantú xtalulóktat y ni huantú caj taaksanín. **9** Huá xpålacata aquinín clipaxuhuayáhu masqui caquincáhuanicán pi nitú quinkasatcán, laqui huixinín xlicana lakskalalán nalitaxtuyátit y ankalhíná nackalhtahuakaniyáhu Dios caj mim-palacatacán laqui lihuana naakatakskoyátit xtala-capastacni. **10** Lihuán niá ccälakanachán xlimak-tutu alisok ccätzoknimán umá quincarta laqui acxní naccalakanachán nitú tlahuapátit nahuán huantú nitlán y nactzucuyán calilacaquilhniyán, chuná cumu la aquit quilitláhuat porque huá quilimapeksinit Quimpuchinacán y nitú caj nac-

calactlahuayahuayán, sinoque laquí caj lihuaca akstítum nalipahuanátit.

¹¹ Natalán, aquit clacasquín pi lipaxúhu calatalatapátit huántu akstítum y aktumá talacapastaci cakalhítit, acxtum calałakalhamántit calamaktyátit y calamaqpuhuantiyanítit; y Dios huanti ankalhiná quincalakalhamanán canecxnicahuá nacatalatamayán. ¹² Masqui ni antá cuilachá, calamacatiyátit y calasnáttit cumu la xlícaná linatalán. ¹³ Xlihuak umakolh natalán huanti uú tali-pahuán Quimpuchinacán lipaxúhu caxakatlilacamachán.

¹⁴ Clacasquín pi xlíankalhiná namaklhcatziyátit nac milatamatcán lácu xlícaná calakalhamanán Quimpuchinacán Jesucristo, lácu capaxquiyán Quintlāticán Dios xahua lacu catalamán Espíritu Santo.

**Xasasti talacaxlan
New Testament in Totonac, Coyutla (MX:toc:Totonac,
Coyutla)**

copyright © 2006 Wycliffe Bible Translators, Inc.

Language: Totonac, Coyutla

Translation by: Wycliffe Bible Translators, Inc.

Totonaco, Coyutla [toc], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Totonac, Coyutla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

88b96e23-f7a2-5cc8-864a-fdcd6f0686f4